

Na, ka marama mai koutou ki te mate nei. Tena he aha te rongoa

Ko taku i whakatakoto atu ai ki te Pirimia i tenei tuunga o te Paremata i penei: me kukuti te kaha o te manga ma te taake, kia kaua o nuku ake i te wahi tuatoru o te moni reti o te whenua, ara kia kaua e nuku ake i te 6/8 o ia pauna o te moni reti, kia toe ai ano te wahi nui o te moni reti ma te iwi kainga.

Na, ka parea ki a koutou ki te iwi tetahi kaha mo ta tatau take. Ma ia iwi, ma ia hapu i roto i tona takiwa e whakawhaiti nga maramatanga mo te taake o ia whenua, o ia whenua e rihi ana. Ko te nunga o nga maramatanga kei nga tari o nga Poari; ko etahi kei nga pakeha rihi; ko etahi kei nga kai-tieki o nga whenua. Hei mua mai o te tuunga o te Paremata a Hune o tenei tau ka haina haere ai he pitihana ma tena iwi ma tena iwi, e whakaatu ana i te mate o o ratau whenua rihi i te taake i ahu mai i te ture o te tau 1917. Ma tena huarahi ka kaha ai matau, a tenei tuunga o te Paremata e heke iho nei, ki te aki atu i tenei take ki te Kawanatanga. Kaore he wahi o nga motu e rua nei i taka ki waho, kaore he Maori i kapea. Ko te mate tenei i whakataukitia ra—"Ehara i te aurukowhao, he takerehaia."

### RATANA.

Ki te Etita o Te Toa Takitini,

Kua kite au i nga korero a Arthur F. Williams, he whakahoki mo aku korero mo Ratana i puta i Te Kopara, i te Toa Takitini, me te N.Z. Churchman. Kua roa rawa tenei te wa hei whakahokinga mo nga korero i Te Kopara, kua mataotaoria. He pu mihini te pu a A. F. Williams, kotahi ano te pakutanga, e toru rawa nga mata. Engari ko te ahua o te kaupapa o nga korero ko nga korero a A. F. Williams i te N.Z. Churchman o Tihema nei, he whakautu mo aku korero o Noema. Ko nga kupu hou ko nga rarangi Karaitipure me te whakatauki mo "te rangai maomao kua taka ki tua o Nukutaurua." E ui ana au na Te Wiremu ake ranei enei kupu na tetahi ranei o nga etita o Te Toa Takitini?

E whakahe ana au ki te etita mo te kore i ta i aku kupu i te N.Z. Churchman, he whakahoki nei a A. F. Williams mo aua korero. Ma te aha e mohiotia ai e te tangata te tika o nga kupu a A. F. Williams kaore nei aku i panuitia? He nui nga korero a A. F. Williams i kotiti